

孝經

008

790

東 京 圖 書 館

九	三	八	經	漢書門
一	七	八	卷	
冊	號	架	函	類

008723-000-9

特56-790

孝經

神彦 三郎、秋元 源吾/刊

M12

AAC-1706



全



古文孝經序

孔安國

孝經者何也孝者人之高行經常也自有天地  
人民以來而孝道著矣上有明王則大化滂流  
充塞六合若其無也則斯道滅息當吾先君孔  
子之世周失其柄諸侯力爭道德既隱禮誼又  
廢至乃臣弑其君子弑其父亂逆無紀莫之能  
正是以夫子每於閒居而歎述古之孝道也夫  
子敷先王之教於魯之洙泗門徒三千而達者



七十有二也貫首弟子顏回閔子騫冉伯牛仲  
弓性也至孝之自然皆不待諭而寤者也其餘  
則悻悻憤憤若存若亡唯曾參躬行匹夫之孝  
而未達天子諸侯以下揚名顯親之事因侍坐  
而諮問焉故夫子告其誼於是曾子喟然知孝  
之爲大也遂集而錄之名曰孝經與五經竝行  
於世逮乎六國學校衰廢及秦始皇焚書坑儒  
孝經由是絕而不傳也至漢興建元之初河間  
王得而獻之凡十八章文字多誤博士頗以教

授後魯共王使人壞夫子講堂於壁中石函得  
古文孝經二十二章載在竹牒其長尺有二寸  
字科斗形魯三老孔子惠抱詣京師獻之天子  
天子使金馬門待詔學士與博士羣儒從隸字  
寫之還子惠一通以一通賜所幸侍中霍光光  
甚好之言爲口實時王公貴人咸神祕焉比於  
禁方天下競欲求學莫能得者每使者至魯輒  
以人事請索或好事者募以錢帛用相問遺魯  
吏有至帝都者無不齎持以爲行路之資故古



文孝經初出於孔氏而今文十八章諸儒各任意巧說分爲數家之誼淺學者以當六經其大車載不勝反云孔氏無古文孝經欲矇時人度其爲說誣亦甚矣吾愍其如此發憤精思爲之訓傳悉載本文萬有餘言朱以發經墨以起傳庶後學者覩正誼之有在也今中祕書皆以魯三老所獻古文爲正河間王所上雖多誤然以先出之故諸國往往有之漢先帝發詔稱其辭者言傳曰其實今文孝經也昔吾逮從伏生

論古文尚書誼特學士會云出叔孫氏之門自道知孝經有師法其說移風易俗莫善於樂謂爲天子用樂省萬邦之風以知其盛衰則移之以貞盛之教淫則移之以貞固之風皆以樂聲知之知則移之故云移風易俗莫善於樂也又師曠云吾驟歌南風多死聲楚必無功卽其類也且曰庶民之愚安能識音而可以樂移之乎當時衆人僉以爲善吾嫌其說迂然無以難之後推尋其意殊不得爾也子游爲武城宰作



絃歌以化民武城之下邑而猶化之以樂故傳  
曰夫樂以關山川之風以曜德於廣遠風德以  
廣之風物以聽之脩詩以詠之脩禮以節之又  
曰用之邦國焉用之鄉人焉此非唯天子用樂  
明矣夫雲集而龍興虎嘯而風起物之相感有  
自然者不可謂毋也胡笳吟動馬蹀而悲黃老  
之彈嬰兒起舞庶民之愚愈於胡馬與嬰兒也  
何爲不可以樂化之經又云敬其父則子說敬  
其君則臣說而說者以爲各自敬其爲君父之  
道臣子乃說也余謂不然君雖不君臣不可以  
不臣父雖不父子不可以不子若君父不敬其  
爲君父之道則臣子便可以忿之邪此說不通  
矣吾爲傳皆弗之從焉也

序終



孝經

開宗明誼章第一

仲尼閒居曾子侍坐子曰參先王有至德要道以訓天下民用和睦上下亡怨女知之乎曾子辟席曰參不敏何足以知之乎子曰夫孝德之本也教之所繇生也復坐吾語女身體髮膚受之父母不敢毀傷孝之始也立身行道揚名於後世以顯父母孝之終也夫孝始於事親中於事君終於立身大雅云亡念爾祖聿脩其德



天子章第二

子曰愛親者不敢惡於人敬親者不敢慢於人愛敬盡於事親然後德教加於百姓刑於四海蓋天子之孝也呂刑云一人有慶兆民賴之

諸侯章第三

子曰居上不驕高而不危制節謹度滿而不溢高而不危所以長守貴也滿而不溢所以長守富也富貴不離其身然後能保其社稷而和其民人蓋諸侯之孝也詩云戰戰兢兢如臨深淵

如履薄冰

卿大夫章第四

子曰非先王之法服不敢服非先王之法言不敢道非先王之德行不敢行是故非法不言非道不行口亡擇言身亡擇行言滿天下亡口過行滿天下亡怨惡三者備矣然後能保其祿位而守其宗廟蓋卿大夫之孝也詩云夙夜匪解以事一人

士章第五



子曰資於事父以事母其愛同資於事父以事君其敬同故母取其愛而君取其敬兼之者父也故以孝事君則忠以弟事長則順忠順不失以事其上然後能保其爵祿而守其祭祀蓋士之孝也詩云夙興夜寐亡忝爾所生

庶人章第六

子曰因天之時就地之利謹身節用以養父母此庶人之孝也

孝平章第七

子曰故自天子以下至於庶人孝亡終始而患不及者未之有也

三才章第八

曾子曰甚哉孝之大也子曰夫孝天之經也地之誼也民之行也天地之經而民是則天之明因地之利以訓天下是以其教不肅而成其政不嚴而治先王見教之可以化民也是故先之以博愛而民莫遺其親陳之以德誼而民興行先之以敬讓而民不爭道之以禮樂而民



和睦示之以好惡而民知禁詩云赫赫師尹民具爾瞻

孝治章第九

子曰昔者明王之以孝治天下也不敢遺小國之臣而況於公侯伯子男乎故得萬國之歡心以事其先王治國者不敢侮於鰥寡而況於士民乎故得百姓之歡心以事其先君治家者不敢失於臣妾之心而況於妻子乎故得人之歡心以事其親夫然故生則親安之祭則鬼享之是以天下和平災害不生禍亂不作故明王之以孝治天下也如此詩云有覺德行四國順之

聖治章第十

曾子曰敢問聖人之德亡以加於孝乎子曰天地之性人爲貴人之行莫大於孝孝莫大於嚴父嚴父莫大於配天則周公其人也昔者周公郊祀后稷以配天宗祀文王於明堂以配上帝是以四海之內各以其職來助祭夫聖人之德又何以加於孝乎是故親生毓之以養父母曰



嚴聖人因嚴以教敬因親以教愛聖人之教不  
肅而成其政不嚴而治其所因者本也

父母生績章第十一

子曰父子之道天性也君臣之誼也父母生之  
績莫大焉君親臨之厚莫重焉

孝優劣章第十二

子曰不愛其親而愛他人者謂之悖德不敬其  
親而敬他人者謂之悖禮以訓則昏民亡則焉  
不宅於善而皆在於凶德雖得志君子弗從也

君子則不然言思可道行思可樂德誼可尊作  
事可法容止可觀進退可度以臨其民是以其  
民畏而愛之則而象之故能成其德教而行其  
政令詩云淑人君子其儀不忒

紀孝行章第十三

子曰孝子之事親也居則致其敬養則致其樂  
疾則致其憂喪則致其哀祭則致其嚴五者備  
矣然後能事其親事親者居上不驕為下不亂  
在醜不爭居上而驕則亡為下而亂則刑在醜



而爭則兵此三者不除雖日用三牲之養繇爲不孝也

五刑章第十四

子曰五刑之屬三千而臯莫大於不孝要君者亡上非聖人者亡法非孝者亡親此大亂之道也

廣要道章第十五

子曰教民親愛莫善於孝教民禮順莫善於弟移風易俗莫善於樂安上治民莫善於禮禮者敬而已矣故敬其父則子說敬其兄則弟說敬其君則臣說敬一人而千萬人說所敬者寡而說者衆此之謂要道也

廣至德章第十六

子曰君子之教以孝也非家至而日見之也教以孝所以敬天下之爲人父者也教以弟所以敬天下之爲人兄者也教以臣所以敬天下之爲人君者也詩云愷悌君子民之父母非至德其孰能訓民如此其大者乎



應感章第十七

子曰昔者明王事父孝故事夫明事母孝故事地察長幼順故上下治天地明察鬼神章矣故雖天子必有尊也言有父也必有先也言有兄也必有長也宗廟致敬不忘親也脩身慎行恐辱先也宗廟致敬鬼神著矣孝弟之至通於神明光於四海亡所不暨詩云自東自西自南自北亡思不服

廣揚名章第十八

子曰君子事親孝故忠可移於君事兄弟故順可移於長居家理故治可移於官是以行成於內而名立於後世

閨門章第十九

子曰閨門之內具禮矣乎嚴親嚴兄妻子臣妾繇百姓徒役也

諫爭章第二十

曾子曰若夫慈愛龔敬安親揚名參聞命矣敢問子從父之命可謂孝乎子曰參是何言與是



何言與言之不通邪昔者天子有爭臣七人雖亡道不失天下諸侯有爭臣五人雖亡道不失其國大夫有爭臣三人雖亡道不失其家士有爭友則身不離於令名父有爭子則身不陷於不誼故當不誼則子不可以不爭於父臣不可以不爭於君故當不誼則爭之從父之命又安得爲孝乎

事君章第二十一

子曰君子之事上也進思盡忠退思補過將順其美匡救其惡故上下能相親也詩云心乎愛矣遐不謂矣忠心臧之何日忘之

喪親章第二十二

子曰孝子之喪親也哭不依禮亡容言不文服美不安聞樂不樂食旨不甘此哀戚之情也言而食教民亡以死傷生也毀不滅性此聖人之正也喪不過三年示民有終也爲之棺槨衣衾以舉之陳其簠簋而哀戚之哭泣擗踊哀以送之卜其宅兆而安措之爲之宗廟以鬼享之春



秋祭祀以時思之生事愛敬死事哀戚生民之本盡矣死生之誼備矣孝子之事終矣  
孝經終

明治十二年十月十日出版御届

定價五錢

一 三字經白文	全壹冊	一 孝經白文	全壹冊
一 大學白文	全壹冊	一 中庸白文	全壹冊
一 論語白文	全壹冊	一 孟子白文	上下貳冊
一 詩經白文	上下貳冊	一 尚書白文	上下貳冊
一 禮記白文	上下貳冊	一 易經白文	全壹冊
一 唐詩選	上下貳冊		

青森縣

神彦三郎

出版人

賣捌所

右同

秋元源吾

滿津輕郡藤崎村  
三百八十六番地

中津輕郡弘前和徳  
町百五十番地



